

CANT

CHANZUN RUMANTSCHA: per promover la cumposiziun

Er las canzungs ston veiver

pb. Strusch en pievel ò tantas canzungs scu la Rumantscheia. Canzungs da tot gener. Tants cumponists aint igl passo ed er digls noss deis on stgaffia chel retg scazi cultural. Ma schi la Rumantscheia e schi la canzung rumantscha duess veiver anavant, alloura stogl er dar novas cumposiziuns. Per promover chegl è neida fundada l'uniun «La chanzun rumantscha».

Tot chels rumantschs tgi cantan ainten ena furmaziun u an cumpagneia, e chegl èn fitgblers an relaziun cun la populaziun, savessan chintar se l'egn u l'oter nom da cumponists. A madem mument stuessans constatar tgi igls ples dad els totgan tar igls trepassos. Bagn, i dat er anc cumponists contemporans. Spontanamaintg nissan andamaint Flavio Bundi, Gion Balzer Casanova, Gion Giusep Derungs ed Alvin Muoth. E gl'è simplamaintg en fatg tgi igls cumponists rumantschs vignan pi rars.

Dar novs impuls

Consciains da chel fatg è sa furmada ena uniun tgi sa nomna «La chanzun rumantscha». Gist per chel scopo da promover er forzas giovnas da piglier la plema, oz naturalmaintg igl computer, e da metter en text an melodia. Forsa er an ena furma pi moderna e tgi bandunga las furmas tradiziunalas tgi cunaschagn. Ensatge tgi stuagn er menziunar an connex cun la canzung rumantscha èn naturalmaintg er igls scribents e poets tgi on furnia igls texts per las canzungs. I dat bagn

anc diversas poesias tgi èn anc betg intunadas, ma er cò vala igl madem scu tar igls cumponists: els èn davantos pi rars. E forsa fasschessigl er bagn da piglier texts per novas canzungs rumantschas cun tematicas digls noss deis. L'uniun numnada less eir ainten chella direcziun. Responsabels èn ena gruppa da 15 persungas cun Clau Scherrer e Giusep Giuanin Decurtins scu manaders da project.

Igl ampren festival

Ossa dattigl gio amprens fretgs dallas activitads dall'uniun. Per igls 15 - 17 da mars 2019 vign organiso igl ampren festival dalla canzung rumantscha a Trun. Tar chest festival vign canto an furmaziuns ad hoc u i pò er esser en chor antier. Chestas furmaziuns vocalas preschentessan cumposiziuns novas e frestgas. I dess er ena giuria tgi valutes las preschentaziuns. Pero betg la prestaziun dalla gruppa vocala, mabagn la cumposiziun. La giuria sa cumpona da musicists da professiun. Igl venderde seira dall'avertura dattigl en concert cun differents cantaudours rumantschs. La sonda e la dumengia èn alloura las preschentaziuns dallas furmaziuns vocalas cun cumposiziuns novas. Chellas dastgan betg neir preschentadas avant la concorrenza. I stattan a disposiziun texts an tots tschintg idioms rumantschs plus rumantsch grischun. Igl cumponists pon pero er eliger sez en text.

Chesta ideia da leir promover uscheia la cumposiziun da novas canzungs rumantschas duess esser persistenta ed igl festival aveir ena cuntinuaziun. Previa è mintga treis onns. Igl proxim festival ins fasschess gudent an Surmeir.



Igl chors duessan saveir cantar er agl avignair canzungs rumantschas, er novas e da cumponists giovens.